



INTRODUCZIUN

DA MARIANO TSCHUOR

Dar perdetga! In act da peisa. Negin dat perdetga mo ual aschia, nun ch'el seigi in da levsenn. Jeu seregordel che miu bab veva giu da dar perdetga avon il mistral ed ils derschaders circuitals. L'impurtonza da quei fatg vein nus giu sentiu bunamein palpablamein duront plirs dis avon il termin fixau. La damonda che mudergiava el: Dun jeu perdetga verdeivlamein? Tgei consequenzas ha mia perdetga? A Gion caschuna sia perdetga buca la minima difficultad. Il cuntrari. Francamein rocla ella ord sia bucca: «Mirei il Tschut da Diu». Senza targlinar muossa el vi sin il Messias: «Jeu vai viu e dau perdetga: Quei ei il Fegl da Diu». Mo co? Tgei eis ei che Gion ei talamein perschuadius, che Jesus da Nazaret sto esser quel, dil Qual las Scartiras havevan gia giu rapportau? El ha viu e cartiu. La forza dil sogn Spert ha dau d'entellir ad el: El eis ei.

Mei a Colmar ell'Alsazia. Mirei leu igl altar dad Isenheim el museum Unterlinden. Contemplei ella part principala digl altar sogn Gion cul tschut enta maun, siu attribut. E mirei siu maun stendiu ed il det mussader che renda vi sin Jesus vid la crusch. Cheu dat in perdetga perschuadentamein, senza il minim dubi.

EVANGELI

Gn 1,29–34

²⁹Il di sissu ha Gion viu Jesus a vegnend neutier ed ha detg: Mirei, il Tschut da Diu che pren naven ils puccaus dil mund! ³⁰Quel eis ei, dil qual jeu hai detg: Suenter mei vegn in ch'ei ordavon a mi, perquei ch'el ei staus avon che jeu. ³¹Era jeu enconuschevel buc el; mo per ch'el vegni enconuschents al pievel d'Israel, sun jeu vegnius e battegel cun aua. ³²E Gion ha dau perdetga culs plaid: Jeu hai viu ch'il Spert ei vegnius giu da tschiel sco ina columba e restaus sur el. ³³Era jeu enconuschevel buc el; mo quel che ha tarmess mei a battegiar cun aua ha detg a mi: Sur da quel che ti vesas ch'il Spert descenda e resta, quel eis ei che battegia cun Spert sogn. ³⁴Jeu hai viu e dau perdetga: Quel ei il Fegl da Diu.